



Sur Andreas Fuchs, vicari general dal Grischun, tar ses referat introductiv.

MAD

# Dieta dals cussegls parochials grischuns

Sa radunads per l'emprima giada a Cuira

■ (cp) Per l'emprima giada en l'istorgia dals cussegls parochials dal Grischun èn quels sa radunads sonda passada en la Scuola auta per teologia a Cuira tar in barat da mainis. L'iniziativa per quel inscunter deriva dal Cussegl pastoral dal Grischun che vegn presidià da Wally Bäbi, Flem. Per questa instituziun èsi uss impurtant da pudair extender l'apostolat dals laics.

## Cussegls parochials

L'invit per questa dieta han pli che 40 represchentants da 20 plaivs tudestgas e rumantschas suandà. I sa tracta da plaivs che han gia in cussegl parochial u da tallas che s'occupan cun il patratg da fundar in tal.

Cussegls parochials èn gremis che gidan a dar vita activa en singulas plaivs ed er en circuits regiunals. Els consistan da laics ed era dad engaschads en la pastoraiziun ch'èn activs cun il plevon sin divers champs pastorals. Era sch'ìls plevons èn ex-officio responsabels per la vita da plaiv, sche vegn bain inqual spiritual ad esser led dal sustegn da quest gremi con-

sultativ. El vegn a tadlar sin quel avant che prender decisiuns e sa laschar gidar en l'operar dal mintgadi. En il temp da mancanza da spirituals èsi prest nunpusaivel ch'il plevon po ademplir persul ses pensum: far messa e spender ils s. sacraments, administraziun, dar ductrina, infurmar ils fidaivels en il temp modern (Fegl parochial, pagina d'internet da la plaiv), ecumena, lavur per la giuventetgna, seniors ed attempads e contactar las diversas uniuns euv.

Per pudair ademplir tut quels pensums ha gia il Concil dal Vatican dà impuls ed emprimas directivas en il spiert da vaira collavuraziun tranter clerus e laics. Mai èsi stà il patratg da concorrenza tgi che duess uss esser cumpetent per tut, sco quai che tsherts spirituals teman anc adina. Quitads fa al Cussegl pastoral dal Grischun ed al vicari general regiunal, sur *Andreas Fuchs*, che blers cussegls parochials han resignà u sisti lur activitad e ch'els dattan be anc en cas singuls vinvant impuls, sa gidond dinamicamain tar la realisaziun da vita ecclesiastica tras entusiasmar il pivel dad esser «catolic». Per

ils preschents èsi stà impurtant d'intervgnir cun ils exempels da Breil-Danis-Dardin e da Tavau dad excellenta collavuraziun ed endriescher co ils problems tranter carstgauns ed organisaziuns èn vegnids schliads.

## Tge èsi era cun ils cristians?

Sut quel titel provocant è er il Cussegl pastoral dal Grischun s'occupà gia la saira avant cun questa tematica. *Rudolf Bauer*, responsabel per la politica interna da la gronda gasetta tudestga «Rheinische Post», ha preschentà als 35 delegads sias experienschas sco schurnalists. El enconuscha la Conferenza episcopala da la Germania, è participant a la Sinoda episcopala a Roma ed ha empruvà dad analizar la odierna baselgia catolica. Sez en noss temp da critica vers ils superius e dignitaris da la baselgia surpaisan ils aspects positifs dal cristianissem vivì en il senn dal pli impurtant cumond da la carezia proximala. Igl è noss duair, sco catolics, da viver mintgadi en il spiert cristian ed esser exempel.